

# 洋縣志

江蘇吳相融著



洋縣志卷六  
藝文志中

洋縣志卷六

誌銘

開國侯楊公墓誌銘

宋 袁 勃

成州通判

忠義立身之大節知勇爲將之要道此古今不易之論也使忠義立於內而或料敵不明臨機不果則亦無益於事功智勇發於外而或偷生以求安避害以圖利則亦無取於名節有一於此則不足以安國家衛社稷乃若忠出天資智稱人傑禦大敵於擾攘濟中興於艱棘卓然在義勇萬人中而獨成義勇之功者其惟楊公平公諱從義字子和鳳翔天興人曾祖懷信曾祖妣王氏祖武晟祖妣李氏皆潛德不仕父仲方以公貴累贈武功大夫母高氏累贈

碩人公幼慷慨嘗以功名自許靖康丙午金人犯順連破諸國狃於常勝侵軼中原所過輒下無敢撓其鋒者時太平久兵備寢弛乃詔陝西五路募義勇萬人勤王詔詞有每聞邊報痛徹朕心之言公聞而歎曰國家艱難正忠臣義士効死之秋豈可久安田里為一身計哉即奮然而起應原州之募太守杜平見而奇之曰汝志不羣首赴義勇所謂以義伐不義異日唾手富貴居吾右矣建炎初三月虜寇涇原忠烈吳公玠破虜大將婁室於青溪嶺分遣公以奇兵邀擊斬首一百七十餘級補進武校尉權天興縣尉三年八月忠烈遣公覘虜動息公被圍於同州聖山

廟公仰天誓曰若出重圍當捐軀報國叱左右矢石交下  
殺數百人虜治雲梯公急取竹為籠實之以土號曰土牛  
有頃雲梯大集遂以土牛挫折之敵亂乘勢大戰而出轉  
承信郎遷隊將四年九月我師不利於富平五路垂陷忠  
烈會諸將於隴州八渡議戰公獨進曰虜人侵軼無敢與  
爭惟公能挫其鋒於青谿嶺者蓋得形勢之助也今虜已  
陷涇原將入熙河計非半載未還為今之計莫若先據地  
利扼其要害以制之當為公先取鳳翔以為基本忠烈曰  
善即檄公領兵進復鳳翔既入悉降其眾不戮一人得粟  
三十萬斛時忠烈方營寶雞西南曰和尚原因國公所得

之粟以資餽餉軍不乏食士卒感悅遂移府事以治之檄  
公知天興縣事本府駐劄轉保議郎陞部將紹興改元三  
月虜自熙河復圍鳳翔勢益熾公告二親曰為人之子非  
敢蹈於不孝今城中兵寡守死無益不若潰圍求援即泣  
別而行公與子大勲率麾下百餘人力戰至夜半突圍得  
出忠烈見而勞之曰爾忠有餘矣奈二親何公泣曰昨在  
圍中勢必俱死萬一天監其衷戮力一戰取之易爾忠烈  
壯之權選鋒統領守神龕四月忠烈遣公與敵戰於渭南  
以奇功轉秉義郎遷副將五月鳳翔虜酋沒立會階州虜  
酋折合各統五萬衆夾攻和尚原忠烈遣公逆擊沒立一



軍於神公大破之獲敵西潑察胡郎君俘斬二百五十有  
一轉武略郎兼閣門宣贊舍人陞正將十月虜元帥四太  
子會諸道兵十餘萬必欲取和尚原先犯神公以警我師  
忠烈遣公擊之公賈勇先登接戰三日虜又分兵寇龍門  
聞統制吳公璘掩擊敗走追及神公虜援兵大至再合戰  
公潛以精兵橫貫其腹斷其首尾吳公引兵追及虜大潰  
俘斬千餘人奪鎧甲牛馬萬計轉武德大夫開州刺史遷  
統領軍馬兼秦鳳路兵馬都監先是虜恥屢敗遂囚公二  
親於青谿寨公內不自安二年正月公乞兵以往忠烈許  
公帶本部出北山斷虜糧道行數日至麻家嶺遇敵接戰

盟日至青谿虜會諸寨兵為援自辰合戰至暮大破虜眾  
奉親以歸忠烈喜曰公深入重地能破強敵迎還二親可  
謂忠孝兩全轉武功大夫三年正月虜寇石板谷忠烈遣  
公禦之公先設伏以待敵至以奇兵劫之虜眾敗走追襲  
十餘里斬首數百轉右武大夫陞鈐轄二月偽元帥四大  
子擁大軍由商於侵饒風關犯梁洋經褒斜道出鳳州再  
攻和尚原忠烈復遣公引本部由間道應援和尚原以功  
轉拱衛大夫公嘗憤虜人侵暴不已得其使命即蹀剽而  
歸之公至和尚原都統郭浩厲聲曰比虜使至公辱而使  
歸是激敵怒今擁眾二十萬來攻請公當之公對曰虜據

梁洋遣人以書見檄言很而色傲欲恃勢脇我儻不辱之  
誠為自辱今日之事決戰而已敵衆百倍何足慮也統制  
吳公親率公等於是鼓行而前徑與虜戰於栢村一擊破  
其三陣敵衆大敗追襲至渭蹂踐溺死者不可勝計水為  
之咽流吳公因謂衆曰此捷楊鈐轄之力也轉親衛大夫  
四年二月虜入寇殺金平自元帥以下盡室而來示無返  
意全蜀震恐既戰我師初不利公急據第二堡外預設鹿  
角地率強弩併力迭射一日三戰殺傷甚衆虜引兵稍卻  
翌日來攻萬人敵堡統領姚仲重傷公代之率諸將戮力  
鏖戰五日所向皆靡大破敵衆餘黨悉遁自是虜不敢輕



舉全蜀之民各安其生者雖吳氏之功然於攻戰之際公  
有力焉以奇功轉中亮大夫郢州防禦使五年辟知洋州  
兼管内安撫司公事公嘗從忠烈登殺金平過第二堡門  
忠烈顧瞻形勢指虜敗處以策擊羈謂公曰此衿喉地往  
歲一戰安危所係非公出力幾敗大事嘆賞久之九年正  
月虜歸我河南侵疆十年五月虜復背盟僞元帥撒離喝  
領大軍侵犯陝右宣撫胡公世將擢公同統制吳諸軍會  
於涇州回山原大戰三日虜氣未衰議者欲潛師而還留  
裨將以扞公曰我輩蒙國厚恩今日當以死戰奈何移  
禍他人願留本部兵以拒之公張蓋示以閒暇虜人競進

公叱咤刀戰縱我軍數萬衆得出遂下回山轉戰十餘里  
全師而還轉協忠大夫七月虜據鳳翔胡公擢公知鳳翔  
府兼管內安撫使就守和尚原八月與虜戰於蒲坡河及  
汧陽連敗敵衆俘斬數百人奪馬千餘匹轉履正大夫陞  
都鈐轄節制鳳翔府忠義軍馬九月遷馬步軍副總管十  
一年七月都統楊政出鳳翔公隸焉與敵人戰於陳倉魚  
龍川石鼻寨屢戰屢捷生獲虜酋珍珠字莖諸軍凱還三  
日僞元帥撒離喝整衆再犯和尚原公才千人進據川金  
坑敵衆益盛士有懼色公厲聲曰當各奮壯心以氣吞之  
聞鼓畢入敵後者斬公率衆先登鼓譟競進自卯至酉殊

死力戰虜衆大敗轉宣政大夫遷統制軍馬和尚原素號  
形勝蓋秦蜀必爭之地虜屢欲以奇取之公扞守二年竟  
無可乘之隙及因糧於敵餽運減省胡公嘉之敷奏於  
朝敵既不得意遂伸和好是時將迎奉 徽廟梓宮請還  
太后驚輅遂許割和尚原十二年春 詔宣諭使鄭剛  
中分畫其地而移公知鳳州既割和尚原而殺金平復為  
要地其傍則仙人原也四川兵費邊儲萃於魚關三者相  
距皆十許里有司謂當得人以守遴選諸帥無出公右者  
十七年命公以本部兵屯仙人原公鎮守其地垂二十年  
保固無虞轉宣州觀察使會 朝廷詔大臣舉智謀武略

可充將帥者參政楊公椿首以公應 詔授正侍大夫三

十一年九月虜主完顏亮遽絕和好南自江淮西連秦隴  
舟車器甲之盛亘古未有乃分遣偽帥合喜統兵數十萬  
自鳳翔至寶雞沿渭水連營列柵占據大散關宣撫招討  
吳公謂公曰賊據散關扼吾衿喉當急圖之遂擢公節制  
軍馬知鳳州公引兵與敵對壘且相視形勢難以力取於  
是盡易旌旗夜增火鼓示不可測虜益增備轉糧草為持  
久計吳公親提大兵出涇秦攻德順軍以分其勢仍命公  
牽制散關偽帥合喜果分兵赴援三十二年閏二月公乘  
勢遣兵出禦愛山底天池原驚撓敵寨及斷其餉道又密

遣兵焚其東西兩山樓櫓鼓譟從之聲震山谷虜人驚駭  
棄關而走公乘勝進據和尚原則虜亦宵遁矣翌日有騎  
數千復來入谷公領兵逆擊之時天大雨雹風霧晝晦公  
選神臂弓射之虜酋中流矢引衆敗去若神助焉寶雞賊  
帥恐我師乘勝擊之盡焚大寨退保鳳翔由是渭水以南  
復歸版籍以功真拜和州防禦使賜爵安康郡開國侯食  
邑一千七百戶食實封一百戶公自壯歲從事軍旅未嘗  
一日在舍盡瘁王事常若不及每自嘆曰吾奮身畎畝荷  
國恩寵誓欲捐軀以効尺寸今年踰七十力所不逮勉強  
而不可得矣會王師解嚴遂丐歸田里其請甚確吳公以



公精力未衰止聽解兵職遂辟知龍州寔隆興元年之七月也明年改知文州又明年吳公移鎮漢中梁洋接境實為重地乃辟公復知洋州兼管內安撫使節制軍馬洋人聞公之來舉酒相賀曰復得吾邦舊使君矣老稚歡迎不絕于路公暇日嘗讀漢留侯傳至願弃人間事欲從赤松子游之言公慨然慕之銳意求退上章力請歸休乾道二年九月勅授提舉台州崇道觀介梁洋間居焉五年二月十八日以疾終于所居之正寢享年七十有八娶韋氏卒再娶苗氏卒皆贈令人又娶張氏累封令人子男八人曰大勳右武大夫果州團練使御前右軍統領權統制彈壓

軍馬安康郡侯食邑一千七百戶曰大亨武經大夫御前  
中軍同統制本管軍馬曰大節從義郎御前前軍第三將  
副將曰大昌秉義郎御前右軍第一將隊將曰大年忠訓  
郎亡曰大林忠翊郎御前前軍第一將隊將曰大森曰大  
有皆成忠郎女十人長適武功大夫左部正將丁立亡次  
適左武大夫御前中軍同統制本管軍馬胡清次適承信  
郎張祐亡次適承信郎郭良臣次適承節郎彭寀次適保  
義郎傅汝弼次適右從事郎城固縣丞張湑餘在室孫男  
十一人曰祖慶秉義郎成都府路第二將隊將曰祖廉承  
信郎御前前軍第三將隊將曰祖榮成忠郎曰祖顯曰祖

仁曰祖寧曰祖椿曰祖輝曰祖賢皆保義郎曰祖詵曰祖訓皆承節郎孫女十七人長適承信郎李雍次適承信郎張師古次適承節郎劉之義次適保義郎侯詵次適承信郎張實餘在室曾孫男三人曰世忠保義郎曰世輔曰世傑皆承節郎曾孫女三人在室元孫男二人曰紹先曰紹光皆承信郎諸子以其年三月甲申舉公之喪葬于城固縣安樂鄉水北村生祠之側維楊氏系緒遠矣自東漢太尉震起于關西以清白遺子孫弈世載德代不乏人公奮乎千載之後自致功名有光于祖可謂天下偉男子矣朝廷雅聞公名故所賜訓詞有曰知義之貴以勇得名益奮

壯心遂成偉績捐紳誦之以為美談公善射發無不中嘗  
偕王人劉參贊子羽行饒風嶺有虎突出叢薄間人皆辟  
易公躍馬而出以一矢斃之故射虎之名喧達都下方二  
親之在虜也而青谿之民日瞻其費賴以保全及公破青  
谿既得二親併載其民以歸給田廬家之於梁洋至今賜  
給不絕朝廷聞之以孝義特賜旌表公之行不特此也為  
郡尤以愛民為本初洋州有楊填等八堰久廢不治公皆  
再葺之溉田五千餘頃復稅租五千餘石又增營田十四  
屯公私以濟民為立祠宣撫處置張公浚聞于上賜詔獎  
諭初公至鳳翔也有流民數萬在境內或疑其反側悉拘